

Болажонларга мактуб (2)

05:00 / 15.02.2017 3505

ИККИНЧИ САБОҚ

МУСУЛМОНЧИЛИКНИНГ БИРИНЧИ БЕЛГИСИ

Ассаиому алайкум, суюкли фарзандларим! Сиз ўтган машғулотида бир неча бор «Аллоҳ» деган сўзга дуч келдингиз. Хўш, у қандай зот экан? Ана шу саволга жавоб беришдан олдин сизга ислом динидаги энг муҳим, энг табаррук бир калимани ўргатиб қўяман, хўпми? Яхшилаб қулоқ солинг: «Ла илаҳа иллаллоҳу Муҳаммадур расулуллоҳ». Қани, овоз чиқариб сиз ҳам бир қайтаринг-чи! Баракалло! Энди унинг ўзбекча маъносини ҳам билиб олинг: «Аллоҳдан бошқа илоҳ йўқ, Муҳаммад унинг расулидир».

Ана шу жумланинг биринчи қисми ҳақида гаплашамиз. Иккинчисини эса кейинги дарсларга қолдирамиз. Демак, «Аллоҳдан бошқа илоҳ йўқ». Хўш, нега бундай дейилган? Нега бутун дунёдаги миллионлаб мусулмонлар бу сўзни кунига юзлаб марта қайтаришади? Нега ана шу сўзни айтган кишиларгина мусулмон бўла олишади? Ҳозир ана шу саволларга жавоб беришга ҳаракат қиламиз.

Атрофингизга яхшилаб бир қаранг-а! Нималарни кўряпсиз? Ҳа, яшанг! Гуллаб, барг ёзиб, мева тугаётган дарахтларни. Ҳар хил овозда сайраётган, чирқиллаётган, қичқираётган, ку-кулаётган қушларни, осмонда чарақлаб нур сочиб турган қуёшни. Кечаси бўлганда ҳаммаёқни ёритиб турган ойни ва юлдузларни. Яна-чи? Яна баланд-баланд тоғларни, катта дарёларни! Иннайкейин, кўчаларни тўлдириб юрган одамларни.

Хўш, ана шу нарсаларнинг ҳаммаси қаёқдан келиб қолган?

Дарахтлами одамлар эккан, десангиз одамларнинг ўзлари қандай пайдо бўлишган? Оналари туққан, десангиз ўша оналар қаёқдан келишган? Саволлар ана шунақа кетма-кет пайдо бўлаверади, уларнинг сон-саноғи бўлмайди. Аммо ҳамма саволга битта жавоб бор: «Буларнинг барчасини Аллоҳ яратган» деймиз.

У шунақанги улуғ, шунақанги қудратлики, Унга ҳеч нарса тенг келолмайди. У эрни ва осмонларни ҳам, ой-қуёш ва юлдузларни ҳам, тоғ ва денгизларни ҳам, ҳайвон ва қушларни ҳам, дарахт ва гулларни ҳам, жиншайтон ва одамларни ҳам, хулласи калом ер устида ва ер остида, осмонда нимаики нарса бўлса, ҳамма-ҳаммасини яратган. У биттагина «Бўл!» деган сўзни айтиши билан ҳамма нарса яралиб пайдо бўлаверади. Ҳатто одамлар ҳам Унинг хоҳиши ва амри билан туғилади, яшайди ва бир куни ўлади.

Аллоҳ одамларни ерда яшаб, яхши ишлар қилишсин, Менинг айтганларимни бажариб, нариги дунёда катта мукофотларимни олишсин ва «Жаннат» деган гўзал боғимда яшаб юришсин, деб яратган. Унинг буюрганларини бажармаган одамларни эса олов ёниб турадиган «Дўзах» деган жойга ташлаб, жазолашини ҳам айтган. Аллоҳ ҳамма нарсани яратган, ҳамма нарса унга бўйсунган бўлса, демак, ундан бошқа ҳеч қандай қудратли, кучли зот бўлмайди-да! Адашибми ёки кимларнингдир гапидан қўрқибми, Аллоҳдан бошқа нарсаларга, масалан, қуёшга, ҳайкалларга, ҳайвонларга, суратларга сиғиниб қўйса ёки ана шу нарсалардан қўрқиб ёки бирор нарсани илтимос қилиб сўраса, Аллоҳга уларни шерик қиingan бўлади. Бу Ислом динида энг оғир гуноҳ (ёмон иш) ҳисобланади. Бу одам ўлдиришдан ҳам, ота-онага қўл кўтаришдан ҳам, ўғирликдан ҳам, ароқ ичишдан ҳам, хуллас, ҳамма ёмон ишлардан ҳам оғир, жуда қаттиқ гуноҳдир. Кўрдингизми, Аллоҳ жуда улуғ, қудратли, ҳамма нарсанинг хўжаси экан. Шунинг учун Аллоҳ номининг ёнига улуғланган «Таоло» сўзини қўшиб айтамыз, Аллоҳ номини эшитган заҳотингиз «Жалла Жалал ла ҳу» деб уни мақтаймыз. Шундай бўлгач, ҳар бирингиз «Ла илаҳа иллоллоҳ» деган калимани ёдлаб олинг, уни ҳар куни, юрганда ҳам, бекор турганда ҳам, уйқуга ётаётганда ва тураётганда ҳам — доимо қайтариб туринг. Фақат ўзингиз ёдлаб қолмай, уни бошқа билмаганларга ҳам ўргатинг. Чунки буни билмаганлар мусулмон бўлмайди. Жаннатга ҳам кирмайди. Келгуси машғулотда «Ла илаҳа иллоллоҳу Муҳаммадур расулуллоҳ» калимасини, албатта, ёдлаб берасиз, келишдикми?